

Месяца ноемвриа в 18-й день
Собора эстонских святых
На велицей вечерни
На Господи, воззвах: стихиры, глас 6.

Подобен: Все отложше:

Все отложивше житейское томление/ и сладость текущую
презревше,/ святии земли Эстонския,/ крест взяте, яко иго
божественное,/ и Христу последовате,/ в Небесный покой чудно
вселитесь,/ приидите к нам, яко скории помощницы,/
сподобляюще даров невестественных/ и молящися о нас усердно,/
ваш праздник совершающих святолепно.

Ины стихиры, глас 2.

Подобен: Киими похвальными венцы:

Киими похвальными венцы/ увязем благовернаго князя
Александра?/ Троицы Святыя и Единоначальныя исповедника,/
Православныя Церкви защитника,/ земнаго Отечества нашего/
мудраго и справедливаго правителя,/ победоноснаго за Русь
Святую воителя,/ миролюбия и благочестия наставника,/
милостиваго молитвенника и небснаго о нас предстателя./ Егоже
молитвами Христос Бог/ дарует земли Эстонстей мир и велию
милость.

Киими похвальными песньми,/ прославим священномученика
добляго Исидора?/ Мучеников сонм Христу приведша/ и с ними
пред вероломными ливонцы/ правую веру прославльша/ и
странная учения и лъстивая увещания их победне отвергша./
Егоже молитвами Христос Бог/ дарует земли Эстонстей мир и
велию милость.

Киими песненными добротами/ ублажим преподобнаго
Корнилия?/ Постников преславнаго вождя,/ иноков кроткаго
наставника,/ языков чудских Христовы веры учителя,/
милосердие и нестяжание в жизни явившаго,/ земное шествие
страдальчески скончавшаго/ и убиение неправедно от царя
приемшаго./ Егоже молитвами Христос Бог/ дарует земли
Эстонстей мир и велию милость.

Киими достойными венцы/ венчаим святителя Платона?/
Преславную отрасль Эстонския земли,/ отечества своего
печальника и просветителя,/ Православныя веры ревнителя,/
истиннаго и милосерднаго архипастыря,/ мученика, кровь свою за
Христа пролиявшаго./ Егоже молитвами Христос Бог/ дарует
земли Эстонстей мир и велию милость.

Слава, глас 8:

Радуйся, Церковь Эстонская,/ во святых своих дивно
прославльшаяся./ Ты бо, благодать изобильну от Господа
стяжавши,/ постничеством и мученичеством,/ проповедию слова
Божия/ и хранением Истины Православия/ воистину
прославилася еси./ Сего ради, ныне светло праздник твой
совершающе,/ молим Отца и Сына и Святаго Духа/ помиловати
души наша.

И ныне, Богородичен: Царь Небесный:

Вход. Прокимен дне. И чтения три.

Пророчества Исаиина чтение (глава 49, 8-15):

Тако глаголет Господь:/ во время приятное послушах тя/ и в день спасения помогах тебе./ И создах тя и дах тя в завет языков,/ еже устроить землю и наследити наследие пустыни./ Глаголюща сущим во узах: изыдите!/ И сущим во тьме: открыйтеся!/ На всех путех пастися будут,/ и на всех стезях пажить их./ Не взалчут, ниже вжаждут,/ ниже поразит их зной, ниже солнце,/ но Милуяй их утешит я/ и сквозе источники вод проведет я./ И положу всякую гору в путь/ и всякую стезю в паству их./ Се сии издалеча приидут,/ сии от севера и моря, инии же от земли Персская./ Да веселятся Небеса, и радуется земля,/ да отрыгнут горы веселие и холми правду,/ яко помилова Бог люди Своя/ и смиренныя людей утешит./ Рече же Сион:/ остави мя Господь, и Бог забы мя./ Еда забудет жена отроча свое?/ Или не помилует исчадие чрева своего?/ Аще ли же и сих забудет жена,/ но Аз не забуду тебе, глаголет Господь.

Премудрости Иисуса, сына Сирахова, чтение (глава 44, 1-14):

Восхвалим убо мужи славны и отцы наша в бытии./ Многу славу созда Господь в них величием Своим от века./ Господствующе в царствиих своих/ и мужи, именовати силою, советующе разумом своим,/ провещавшии во пророчествах;/ старейшины людей в советех/ и в разуме писания людей./ Премудрая словеса в наказании их;/ ищуще гласа мусикийска и поведующе повести во писаниих,/ мужи богатии, обдаровани крепостию,/ мирно живуще в жилищих своих./ Все сии в родех прославлени быша,/ и во днех их похвала./ Суть от них иже оставиша имя, еже поведати хвалы./ И суть, иже несть памяти, и погибоша, яко не сущии,/ и быша яко не бывше, и чада их по них./ Но сии мужие милостивии,/ иже правды не забвены быша,/ с семенем их пребудет доброе наследие,/ изчадия их в заветех./ Остася семя их и чада их по них,/ до века пребудет семя их,/ и слава их не потребится./ Телеса их в мире погребена быша,/ а имена их живут в роды./

Премудрость их поведат людие,/ и похвалу их исповесть Церковь.

Премудрости Соломоновы чтение (глава 3, 1-9):

Праведных души в руце Божией,/ и не прикоснется их мука./ Непщевани быша во очесех безумных умрети./ И вменися озлобление исход их./ И еже от нас шествие – сокрушение, они же суть в мире./ Ибо пред лицом человеческим аще и муку примут,/ упование их безсмертия исполнено./ И в мале наказани бывше,/ великими благодетельствовани будут,/ яко Бог искуси я и обрете их достойны Себе./ Яко злато в горниле, искуси их/ и, яко всеплодие жертвенное, прият я,/ и во время посещения их возсияют/ и, яко искры по стеблию, потекут./ Судят языком и обладают людьми,/ и воцарится Господь в них во веки./ Надеющиися Нань уразумеют истину,/ и вернии в любви пребудут Ему./ Яко благодать и милость в преподобных Его / и посещение

во избранных Его.

На литии стихиры, глас 1:

Сынове века сего аще и глаголют:/ приидите, отставим вся праздники Божия от земли,/ но Царство Господне и еще державствовати имать,/ дерзость врагов Церкви Христовы отражающе./ Темже, настоящее торжество светло празднующе,/ Единому Царю и Богу нашему возопиим:/ слава Тебе, землю Эстонскую освятившему,/ слава Тебе, святых в ней прославльшему,/ слава Тебе, и ныне верным крепость дарующему. Приидите, празднoлюбцы,/ воспоим святителя Агафангела достоблаженнаго,/ доблестию исповедания своего/ Церковь Прибалтийскую прославившаго,/ и ныне в сонме святых Бога воспевающаго/ и молящагося о душах наших.

Приидите, мучениколюбцы,/ прославим архипастыря Божия Арсения,/ иже за правду беззаконно изгнан бысть,/ святительскаго сана совлечен/ и в темнице града Ревеля,/ яко узник, смерть прият./ Ныне же на Небесех с лики праведных,/ яко исповедник истинный,/ блаженством наслаждается/ и молится, спастися душам нашим.

Слава, глас 8:

Мужайся, Церковь Христова,/ и державствуй над всею борющимися!/ Христови бо друзи о тебе пекутся,/ и предстояще и обстояще,/ ихже общий праздник ныне совершаеши светло.

И ныне, Богородичен, глас тойже:

Владычице, прими молитвы святых сродников наших / и избави землю Эстонскую/ от всякия нужды и печали.

На стиховне стихиры, глас 5.

Подобен: Радуйся:

Радуйся, преславне отче Иоанне,/ земли Наровския изрядный учителю,/ Села Царскаго пресвитере/ и Церкви Российской первомучениче,/ благодать бо сугубая дадеся ти/ первым пострадати за Христа от безбожных./ Сего ради ныне дерзновение имаши / усердно молитися за роды наша/ и не оставляти попечением своим паствы Эстонския.

Стих: Господи, Господь наш,/ яко чудно имя Твое по всей земли.

Радуйся, священномучениче Димитрие,/ Знаменския церкви именитый пастырю/ ты бо, залог, данный ти от Христа Бога, и верность Ему/ даже до смерти мученическаго сохранил еси,/ темже ныне и со Ангелы и лики эстонских святых/ на Небесех светло радуешься/ и молишися о душах наших.

Стих: Святым, иже суть на земли Его,/ удиви Господь вся хотения Своя в них.

Радуйся, священномучениче Александре,/ честная похвало града Нарова./ Ты бо, не убоаясь гонителей Церкви Божия/ и крестом Христовым прогоняя страх человеческий,/ к месту твоего мучения/ право и дерзновенно шествовал еси/ и молился еси усердно за убивающих тя.

Слава, и ныне, глас и подобен тойже:

Радуйся, горо Пюхтицкая,/ слава бо Господня на тебе возсия./ Се бо Пречистая Богородица/ восхоте устроить zde обитель Свою честную,/ инокинем тихое пристанище,/ православным людям священное прибежище/ и миру утешение велие.

Тропарь, глас 4:

Днесь ликует Церковь Эстонская,/ ветвь плодоносна древа Российския Церкви сущи/ и, яко плоды красны, Христу приносящи,/ святыя своя прославляет./ Тех молитвами, Господи,/ Православие в земли Балтийстей сохрани,/ паству от расколов и междоусобия избави / и всем христолюбивым людям/ даруй велию милость.

На утрени

На Бог Господь: тропарь святых дважды, глас 4. Слава, и ныне,

тропарь Пюхтицтей иконе Пресвятыя Богородицы, глас 1:

На горе святей пастырем овчих стад явилася еси,/ Дево, Пречистая Богородице,/ обитель славную на месте сем устроить восхотела еси,/ в ней же сердца наша милостивно согреваеши,/ и души наша просвещаеши,/ от прелестей века сего благодатию нас свобождаеши,/ и к Небесней отчизне выну простиратися наставляеши,/ грехи наша многия очищаеши./ Сего ради во умилении благодарно вопием Ти:/ Радосте наша, прими наше теплое и смиренное о Тебе похваление.

По 1-м стихословии седален, глас 2:

Соборе святых Эстонских,/ полче божественный,/ молитесь ко Господу/ о земном отечестве вашем/ и о почитающих вас любовью.

Слава, и ныне, Богородичен:

Якоже купина, огнем опаляема и невреждено пребывши, явися Моисею в Синаи иногда,/ тако и обитель Пречистыя Приснодевы на горе Пюхтицстей, благодатию сияючи,/ непоколебима пребывает, освящаючи всех с верою в ней водворяющихся.

По 2-м стихословии седален, глас 2:

Яко солнце светлое,/ возсия честная память святых земли Эстонския,/ освещаючи и согреваючи сердца наша,/ паче же призываючи подражати житию их и ревности о вере.

Слава, и ныне, Богородичен:

Иконы Твоя явление, Богородице Пренепорочная,/ славословим днесь и Твое заступление празднуем:/ яко бо Мати сущи Живота,/ молиши о нас Сына Твоего и Бога нашего,/ на Тя упование и надежду возложивших.

Величаение:

Величаем вас,/ святии земли Эстонския,/ и чтим святую память вашу,/ вы бо молитесь за нас/ Христа, Бога нашего.

По полиелеи седален, глас 5:

Светло совершающе настоящее торжество,/ восхвалим угодники Божия./ землю Эстонскую благовестием евангельским огласивших,/ и веру Православную в ней утвердивших,/ и ко Отечеству Небесному путь нам указующих.

Слава, и ныне, Богородичен, глас тойже:

Пречистая Богородице Дево,/ помилуй нас, прибегающих к Тебе с верою,/ и просящих теплаго Твоего заступления:/ можеш бо, яко Благая, всех спасти матерними Твоими молитвами.

Прокимен, глас 4: Радуйтесь, праведнии, о Господе,/ правым подобает похвала. Стих: Буди, Господи, милость Твоя на нас, якоже уповахом на Тя. Евангелие от Матфея, зачало 10.

По 50-м псалме стихира, глас 6:

Ежелетнюю память днесь святых земли нашае совершающе,/ достойно сия да ублажим./ Тии воистинну путем Господним проидоша:/ обнищаша бо духом и обогатишася,/ кротцы быша и землю кротких наследоваша,/ плакаша и утешишася,/ миловаша и помиловани быша,/ чистоты сердца достигоша и Бога узреша,/ о мире пекущеся и божественнаго сподобишася сыноположения,/ гоними быша Правды ради и ныне на Небесех радуются/ и прилежно молятся Господеви / помиловатися душам нашим.

Канон Пресвятей Богородице, глас 8.

Песнь 1

Ирмос: Воду прошед, яко сушу,/ и египетскаго зла избежав,/ израильтянин вопияше: / Избавителю и Богу нашему поим.

Запев: Пресвятая Троице Боже наш, слава Тебе.

О, Троице Вседержительная и Единице Триипостасная,/ душу мою, и сердце, и ум, молю, просвети и благодатию освяти,/ к Божественней Твоей любви, возведи,/ и настави благочестно пети благосердие Приснодевы Благословенныя.

Запев: Пресвятая Богородице, спаси нас.

Благаго Царя Благая Мати,/ Яже всем благопослушная в прошениях и всесильная в благодеяниях!/ Благодать света Твоего и нам низпосли, Богоблагодатная,/ песнь Тебе, возсылающим.

Лик ангельский радостно славословит Тя, Владычице./ Мы же, брэннии, что Ти принесем?/ Точию усердная благодарения.

Архангельский глас вопием Ти: радуйся, Благодатная./ Аще и недостойни есмы, благости ради прими сей, Владычице,/ светом милости Твоея нас просвещаючи и благодать всем подаючи.

Ин канон святым земли Эстонския, глас и ирмос тойже:

Запев: Все святии земли Эстонския, молитесь Бога о нас.

Воспоим согласно вси в песнях духовных/ во благочестии просиявшия божественныя отцы наша,/ освятившия землю Эстонскую, иже Церковь Православная воспита.

Яко меч обоюдоострый, был еси, благоверный княже Александре,/ прогоняя враги и защищая приделы Земли нашае./

И ныне скорое заступление подаждь молящим тя усердно.

Страдальче святой Исидоре блаженне/ и личе славный мучеников Юрьевских,/ вы, во уметы вменивше вся красная мира сего,/ обрели есте Христа, Бога нашего,/ истинную Красоту и некрадомое Богатство.

Богородичен: Слезы покаяния подаждь ми, Пречистая,/ очисти мя от беззаконий/ и чиста представи Сыну Твоему и Богу нашему.

Песнь 3

Ирмос: Утверждей в начале небеса разумом/ и землю на водах
основавый, / на камени мя, Христе, заповедей Твоих утверди, /
яко несть свят, паче Тебе, Едине Человеколюбче.

Грядите, вернии,/ почтим Пречистую Богоматерь,/ явлением
святаго образа Своего гору Пюхтицкую освятившую/ и мир и
благословение людем православным дарующую.

Освящается, Богородице, Твоею благодатию всяк ум верных/ и
возвышается к Горнему чудным пришествием иконы Твояе,/ юже
благочестно почитаем и Тебе верно славим.

Даждь нам, Богоневестная, ненаветно шествовати стезею
богоугодных деяний,/ яко да Твоим, Дево, заступлением,/
злокозненнаго пути уклоньшися, присносущныя славы будем
общницы.

Ангельскаго мира вышшая, Пресвятая Дево, Владычице,/
омраченная грехми сердца наша просвети/ и от земных
попечений к Небесному покою настави.

Ин

Просветил еси светом истинныя веры Православныя люди
неверныя,/ преподобномучениче Корнилие./ Озари и нас,
грешных, страстем своим служащих, благодатию Всеблагаго Бога/
и на камени заповедей Христовых утверди.

Удалилася еси в пустыню с супругом твоим, преподобная Вассо,/
да Христу вящши послужиши;/ явилася еси добрая строительница
обители Печерския,/ немощное естества женскаго отринувши./
Темже и по кончине твоей дивно прослави тя Господь Бог наш,/
Емуже предстоящи, поминай чтущия тя.

Уязвился еси, преподобне Ионо, желанием жития
страдальческаго,/ егда услышал еси о кончине сопастыря твоего
святаго Исидора,/ и, оставив житие мирское, на подвиги велия
устремился еси./ Сего ради и ныне обитель Печерская
прославляет болезни и труды твоя/ и благодарно тебе вопиет:/
радуйся, устройтелю иноческаго чина/ и молитвенниче
неусыпный о душах наших.

Богородичен: Пресвятая Дево,/ Ты еси воистину священников
Ходатаица неусыпаемая,/ мучеников терпение,/ преподобных
укрепление/ и всея земли Эстонския покров и защита./ Моли
спастися душам нашим.

Седален, глас 8:

Нощней тьме огустевающей,/ умножается звездный блеск,/ и к
тому очи заблуждших радостно возводятся./ Тако и
умножившейся на земли греховней тьме,/ возведем горе очи
наша, братие,/ и, сияние духовных звезд, землю нашу озаряющих,
узревше,/ к Небесному Отечеству потщимся,/ егоже да не лишит
Господь нас, грешных,/ молитвами святых Своих.

Слава, и ныне, Богородичен:

Приидите, людие,/ поклонимся чудотворному и всечестному
образу Божия Матере,/ и к Ней с любовию и благодарением

возопим:/ радуйся, непрестанно славословимая и восхваляемая,/ радуйся, явлением Своим гору Пюхтицкую освятившая,/ радуйся, обитель славную zde устроившая,/ радуйся, икону Свою, яко стража неусыпна и необорима, ей даровавшая,/ радуйся, источник воды живыя в той открывшая,/ радуйся, с сестрами невидимо пребывающая./ Радуйся, Дево Чистая,/ руце Свои милостивно к нам простирающая.

Песнь 4

Ирмос: Ты моя крепость, Господи, / Ты моя и сила, / Ты мой Бог, Ты мое радование,/ не оставль недра Отча/ и нашу нищету посетив./ Тем с пророком Аввакумом зову Ти:/ силе Твоей слава, Человеколюбче.

Образ честный Твой, Дево,/ Творец всех и Создатель, вседержительною силою преславно горе Пюхтецстей дарова/ на спасение человеком и исцеление./ Сего ради гора сия место свято явися.

Приидите, вернии и с любовью припадем чудотворному образу Пречистыя Девы, умильно зывающе:/ низпосли, Благодатная, милость рабом Твоим.

Пречистый Твой образ, Всепетая,/ неизреченными чудесы и благодатями украсивши,/ в земли Эстонстей прославила еси./ Сего ради мы, поклоняющиеся тому,/ песнь благодарения Тебе приносим.

Помощница всем христианом, от Бога нам дарованная,/ Того моли, Всеблагая,/ да презрит наша безчисленная согрешения/ и избавит тмы кромешныя и муки вечныя.

Ин

Жезл архиерейский вручен бысть тебе, священномучениче Платоне,/ Патриархом Всероссийским Тихоном/ на подвиг крестный во дни мятежа кроваваго и годину лютых гонений./ Ты же, пастырю добрый,/ не убоился еси хулителей веры Православныя,/ пастве твоей верен был еси даже до смерти. Елеем добрых дел, священномучениче Николае,/ наполнил еси светильник свой,/ просвещая сердца пасомых светом богоразумия/ и путеводя их в Чертог Царя Небеснаго./ Сего и нас сподоби молитвами твоими.

Сердечным желанием распалаемь, отче Михаиле,/ еже пострадати за Христа со святителем Платоном,/ во времена власти безбожныя и години лютыя./ Предстал еси вкупе с ним пред гонители,/ показуя нам яко совершенная любви вон изгоняет страх.

Богородичен: Милостию Твоею, Дево,/ исцели души моя язвы греховныя/ и ум мой просвети, омраченный помысли лукавыми и вражиею злобою.

Песнь 5

Ирмос: Утренюет дух мой к Тебе, Боже,/ от Отца рожденному неизреченно/ и воздвигнувшему рог спасения нам.

Ты, о Благодатная, милостивным Твоим явлением гору

Пюхтицкую благословила еси/ и землю Эстонскую тем просветила

еси,/ к свету Вышня славы верныя возводящи.
Омрачихомся помыслы, отягчихомся грехи,/ но Ты, Милосерная Мати, просвети ны/ и на правый путь настави.

К пречестней Твоей иконе благочестно притекающия, о Богомати,/ и усердно покланяющияся,/ и верно повсюду Тя призывающия предвари,/ от бед всяких спасающия,/ и лютых недуг избавляющия,/ и духи лукавыя прогоняющия,/ тишину и здравие подающия всем, Владычице.

Не остави нас, Богородительнице,/ лютыми помышлени и воспоминани от лукавых врагов стужаемых зельне,/ но осени Твоею благодатию,/ покрывающия и спасающия от всех их навет, Богоблаженная.

Ин

Место покоя праведнаго и врата отверсты в Царство Небесное/ явися ти Ревельская темница, священномучениче Арсение,/ Темже освятися град сей и обрете тя крепкаго своего заступника/ и молитвенника о душах наших.

Евангельски пожил еси на земли, святе Арсение,/ безропотно претерпев беды многия:/ заточение в темнице, поношение от сильных мира сего,/ неправедное лишение сана и прочия злокозни диавольския./ Темже и Господеви угодил еси, кротко взывая:/ благо мне, яко смирил мя еси.

Благоговейно почтим, вернии, святителя Агафангела,/ архипастыря мудраго земли Балтийския, храмов Божиих созидателя,/ Православия ревнителя, инославных попечителя,/ первосвятителя Церкви Российския сподвижника, мужественнаго исповедника/ и в смутная времена истиннаго миротворца. Богородичен: Роди вси блажат Тя, Богородице Дево, якоже иногда прорекла еси./ Сего ради и земля Эстонская архангельски вопиет Ти:/ радуйся, Благодатная, Господь с Тобою.

Песнь 6

Ирмос: Молитву пролию ко Господу/ и Тому возвещу печали моя,/ яко зол душа моя исполнися/ и живот мой аду приближися,/ и молюся, яко Иона:/ от тли, Боже, возведи мя. Обитель Пюхтицкая в преславнем пришествии Твоея иконы, Царице,/ чудес и Божественных даров благодатию Твоею исполнися/ во утверждение благочестия всех верных,/ еуже днесь супостаты низлагаются и славящия Тя крепце утверждаютя. Селение святое сие, святыи дом Твой, Дево Богоневесто,/ сохрани от сопротивных нахождения и от всех навет вражиих, и вся грады и страны христианския,/ любовию поющия Тя и верно почитающия пречистый образ Твой.

Освящение, здравие и спасение подавай душам и телесем нашим, Мати Божия,/ благочестно покланяющимся иконе Твоей/ и усты и сердцем благоговейно ю со страхом целующим/ и верою Тя присно славящим.

Державный покров и стену небориму стяжавше Тя, Приснодево Богородице,/ упование на Тя с Богом возлагаем и прилежно

молим:/ силою Твоею стрелы вражия и козни вся бесовския немощны покажи/ и крепкая Помощница наша буди.

Ин

Изрядная похвало града Нарова, мучениче и пастырю Димитрие,/ не забуди нас, почитающих память твою,/ буди щит и ограждение древнему граду,/ в немже душу свою положил еси за паству./ Буди ходатай и помощник православным людям,/ прославляющим святую память твою.

Воспоим, вернии, новомученика Александра, пастыря Нарвского,/ от гонителей безбожных смерть приемшаго/ и кровь неповинную за Христа пролившаго.

Ревностно пастырский долг исполнил еси, священномучениче Иоанне,/ моляся с сослужители твоими, да престанет братоубийство во отечестве нашем,/ и сего ради, от безбожных убиен, яко жертва благовонная, в Царство Небесное возшел еси.

Кондак, глас 8:

Днесь святии земли Эстонския предстоят Богу/ и усердно за ны Ему молятся,/ Ангели славословят с ними,/ и вси святии Церкви Российской им спразднуют,/ о нас молят вси купно с Богородицею Превечнаго Бога.

Икос:

Едемскаго рая дрeвеса доброплодная и красная явишася, святии,/ цветы благовонныя учений и плоды дел творящии,/ от нихже души наша питаются и глад наш духовный утоляется./ Приидите убо, притецем под сень их и ублажим,/ яко страны нашае отраду и украшение,/ и яко жития образ нам и начертание./ Тии бо венцы прияша нетленныя от Превечнаго Бога.

Песнь 7

Ирмос: Божия снизхождения/ огонь устыдеса в Вавилоне иногда,/ сего ради отрoцы в печи радованною ногою,/ яко во цветнице, ликующе, пояху:/ благословен еси, Боже отец наших.

Честный образ Твой, Владычице, неизреченною благодатию присно сияет/ и даровании духовными земныя просвещает,/ к Небесному наставляет, и к вечному животу устрoяет/ за неизглаголанную Твою благодать.

Твоего боголепнаго явления, Чистая,/ и преславнаго иконы пришествия и чудес пучины,/ витийствующих уста никакоже возмогают исповедати./ Мы же, немощнии, что возглаголем?/ Точию: помилуй и спаси нас, Всемилостивая Владычице.

Известная верных Помощнице и всех благих Подательнице,/ прими нас, с любовью к Тебе припадающих и вопиющих:/ помилуй нас, Госпоже, помилуй нас,/ якоже ныне, тако и во оный день буди нам Помощница и Заступница.

Мати Божия Милосердая,/ двери милости Твоя отверзи нам/ и от уст мысленных волков исхити, хотящих нас до конца погубити./ Помилуй, молим Тя, Владычице, помилуй,/ не отврати рабы Твоя.

Ин

Не посрамил еси достоинства иерейскаго,/ егда невернии томиша

тя страхом смертным./ Вся ложныя глаголы, на тя возводимыя,
отринул еси и безбоязненно рекл еси:/ вина моя единая, яко
пастырь Божий есмь./ Сего ради ублажаем тя, отче Сергие,/
мученическую кончину в Везенберзе за Христа приемшаго.
Всероссийский молитвенниче, славо Кронштадта и Церкви
Российския, отче наш Иоанне,/ многими храмы украсивый землю
Эстонскую и славную обитель Пюхтицкую в ней утвердивый./
Ныне не престай насаждати и укрепляти в нас веру Православную
твоими к Богу ходатайствы,/ да с тобою выну славим Всеблагаго
Бога.

Любве ради Христовы вся, яже на земли, приобидел еси,
преподобне Серапионе,/ и, в пустыню вселився, мудрование
плотское умертвил еси,/ и, постническими труды и зельным
воздержанием свое житие уяснил еси./ Сего ради почитаем тя и
светоносную память твою празднуем, богоблаженне.
Богородичен: Милостива мне буди, Преплагая Дево,/ и, уязвлена
мя оружием греха,/ врачевством Твоея молитвы изцели,/
благословен, зовуща, Плод чрева Твоего.

Песнь 8

Ирмос: Покрываяй водами превыспренняя Своя,/ полагай морю
предел песок и содержи вся,/ Ты поет солнце, Ты славит луна,/
Тебе приносит песнь вся тварь,/ яко Содетелю всех во веки.
Преславная днесь поюще,/ святей иконе Твоей благоговейне
поклоняемся, Госпоже Царице./ Славящая Тя благодатию
божественною осени,/ на враги укрепи и отечество наше в мире
соблюди.

Воспоим с насельницами обители Пюхтицкия благой Владычице,/
токи благодати источающей от Своея чудотворныя иконы:/
хвалим, благословим, поклоняемся Ти, Богородительнице,/
поюще и превозносяще Твоя чудеса во веки.

Радости вина, Всеблагословенная,/ радуйся, Всенепорочная,
радуйся, Благодатная,/ держава наша и ограждение и
спасительное прибежище./ Спаси ны, рабы Твоя,/ на Тя бо
надеемся и Тебе поем во веки.

Тя жизни нашея/ Хранительницу крепку стяжахом и Надежду
спасения./ Молим Тя, Благосердая:/ по кончине ходатайствовать
не престай о нас, / яко да будущих мучений избавимся/ и
милостива обрящем Сына Твоего и Бога нашего в день Судный.

Ин

Дивна проповедь твоя,/ незыблемо упование твое,/ твердо бо
веровал еси и учил еси, святителю Платоне,/ яко благочестие на
вся полезно и на земли никогдаже исчезнет.

Веру Православную пред ливоны проповедавши,/ к вечным
востекоша обителем Исидор пресвитер/ и с ним собор
мученический во граде Юрьеве./ Ныне же, предстояще Царю
царей,/ молятся о почитающих их память.

Священством достойно облечен бысть/ и преподобием зело
удобрен, преподобномучениче Корнилие,/ дом Богородицы,

украсив, прославил еси,/ чуждъ языческую ко Христу привел еси/ и землю Эстонскую кровию своею обогрил еси./ Темже со святыми Христу предстоя,/ моли спастися душам нашим.

Богородичен: Избави мя от напастей, Владычице,/ и борющия мя враги побори,/ утверди на камени заповедей Сына Твоего/ и душу мою просвети, Двере Божественнаго Света.

Песнь 9

Ирмос: Ужасеся о сем Небо,/ и земли удивишася концы,/ яко Бог явися человеком плотски/ и чрево Твое бысть пространнейшее небес./ Тем Тя, Богородице,/ Ангелов и человек чиноначалия величают.

Икона Твоя, Владычице, святолепно явися в Пюхтецтей обители,/ верныя благодатию озаряючи, вопиющия:/ истинно честнейши всех еси, Дево Чистая.

Благодарственное пение за неизреченное Твое милосердие, Богоблагодатная, от нас прими,/ прошения наша на пользу исполняючи,/ и к высоте Горней всех возведи, верно зовущих:/ истинно вышши всех еси, Дево Всенепорочная.

Чудес и милостей Твоих, Владычице к земли Эстонстей/ никакоже достойно украсить можем витийством словес,/ точию усердно молим Тя, Царице:/ прости нас, грешных и немощных,/ воистину сердечно Тя почитающих.

Роди вси, блажим Тя, Богородице,/ яко радости вся ны исполнила еси/ преславным явлением Пюхтицкия иконы Твоея, Пречистая./ Ей же днесь поклоняющася, умильно молим Тя:/ не лиши, Владычице, Твоих рабов в будущем веце неизреченныя радости.

Ин

Сила твоя необорима бысть по вере твоей благоверный княже Александре,/ сего ради прославися имя твое во всех языцех./ И ныне молим тя:/ враги наша невидимо отражай ополчающияся на Православную веру.

Небеснии граждане, святии земли Эстонския,/ не забудьте земное отечество ваше,/ яко на вас упование по Бозе и Богородице возложихом.

Прехвальнии отцы наша,/ вас ни земля потаила есть, но Небо прият вы,/ и отверзошася вам райския двери,/ и, внутрь рая бывше, Древа жизни наслаждается./ Христу молитесь, даровати отечеству вашему мир и велию милость.

Богородичен: Землю создавый и небо одевай облаки,/ новотворит Господь Адама,/ в плоть человеку от Тебе, Девы Чистыя, одеаяся./ Сего ради Тя, Пречистая, воистину Богородицу почитаем.

Светилен, глас 3:

В песнех восхвалим светила земли Эстонския,/ таинники Христа, Божественнаго Слова,/ Иже сих просветившаго и возлюбившаго и помощники нам ко спасению даровавшаго.

Слава, и ныне, Богородичен:

Пред иконою Твоею Пюхтицкою инокинь собрание вопиет Ти,

Владычице:/ О, сладкая Мати Царя Христа,/ буди покров Твоя обители и радость всем верным.

На хвалитех стихиры, глас 8.

Подобен: О, преславнаго чудесе:

Днесь радуется Церковь Эстонская,/ имущи сонм святых своих,/ тии бо суть первейшии ходатаи/ ко Владыце, Христу Богу нашему,/ и наставницы ко истинней вере,/ от земли в Царство Божие пресельшиися,/ и ныне усердно молящиися/ даровати душам нашим мир/ и велию милость.

Днесь, вернии, похвальными венцы/ венчаем вся святыя Церкви Эстонския,/ Престолу Божию предстоящая/ и милостивно нас посещающая,/ страны наша хранители,/ веры истинныя в ней утверждение,/ православных поборники,/ ихже молитвами возношение врагов наших Христос Бог низложи,/ имеяй велию милость.

О, велицыи сродницы наши,/ земли Эстонския заступницы,/ именованныи и безыменнии,/ явленнии и неявленнии,/ Небеснаго Сиона достигшии/ и славу многу от Бога приимшии,/ утешение нам, в скорби сущим, испросите,/ Церковь нашу во благочестии утвердите/ и от нас, яко дар, песнь благодарения примите.

Слава, глас 4:

Святии сродницы наши,/ цветы духовнии земли Эстонския,/ похвало наша, утверждение и благоутишное пристанище,/ вами церковь наша хвалится,/ стяжавши, яко неистошимое сокровище,/ жития же ваша и многая чудеса/ прославляют прославльшаго вас Господа./ Егоже молитесь,/ даровати душам нашим велию милость.

И ныне, Богородичен, глас тойже:

Днесь сияет благодатию Божиею гора Пюхтицкая,/ идеже явися Жена Благолепная,/ светом дивным облеченная,/ Избранница всего рода человека,/ изволившая сотворити гору сию/ местом прославления Своего/ и чистаго, непорочнаго Христу Богу служения,/ местом святыни Господней в долготу дней.

В качестве молитвы можно порекомендовать молитву Всем святым в Земли Российской просиявшим, с некоторыми изменениями.

Молитва ко всем святым земли Эстонския

О, всеблаженнии и богомудрии угодницы Божии, подвиги своими землю Эстонскую освятившии и тела своя, яко семя веры, в ней оставльшии, душами же своими Престолу Божию предстоящи и непрестанно о ней молящиися! Се ныне, в день общаго вашего торжества, мы, грешнии, меньшии братия ваши, дерзаем приносить вам сие хвалебное пение. Величаем ваша великия подвиги, духовнии воины Христови, терпением и мужеством до конца врага низложившии и нас от прелести и козней его избавляющии. Ублажаем ваше святое житие, светильницы Божественнии, светом веры и добродетелей светящиися и наша

умы и сердца богомудренно озаряющие. Прославляем вашу великая чудеса, цветы райсти, в стране нашей прекрасне процветшии и ароматы дарований и чудес повсюду благоухающие. Восхваляем вашу богоподражательную любовь, предстателие наши и покровителие, и, уповающе на помощь вашу, припадаем к вам и вопием: вси святии сродницы наши, от лет древних просиявшии и в последния дни подвизавшиися, явленнии и неявленнии, ведомии и неведомии! Помяните нашу немощь и уничтожение и молитвами вашими испросите у Христа Бога нашего, да и мы, безбедно преплывше житейскую пучину и неврединно соблюдше сокровище веры, в пристанище вечнаго спасения достигнем и в блаженных обителех Горняго отечества вкупе с вами и со всеми угодившими Ему от века святыми водворимся благодатию и человеколюбием Спасителя нашего Господа Иисуса Христа, Емуже со Превечным Отцем и со Пресвятым Духом подобает непрестанное славословие и поклонение от всех тварей во веки веков. Аминь.